

Conferenza: cultura, comunicazion e contrasé

La Mendranzes se à dit de contra ai desseignes de lege de PD e PDL che vel mudèr la lege



La Conferenza de la Mendranzes metarà sù n grop de lurier che se cruziarà del setor de la comunicazion e del digitèl.

Mendranzes - Sarà i ladins a raprezentèr la mendranzes tel Forum trentin per la cultura. La scontrèda de la Conferenza de la Mendranzes che se à tegnù enstadi a Trent à nominà col consens de duta la radunanza l diretor de l'Istitut culturèl ladin Fabio Chiocchetti per chesta encèria. La Conferenza de la mendranzes che tol ite i aministradores e i raprezentanc del mond culturèl e scolastich ladins, mochegn e cimbri con a cef l president Lorenzo Dellai, à recognosciù i meric e la capacità profesionèla de Fabio Chiocchetti. L diretor de la Majon di Fascegn se à dit desponibol a tor sù l'encèria per se fèr portaousc di besegnes e de la proponetes de duta la mendranzes. L Forum per la cultura, vidà da l'assessor Franco Panizza, se cruziarà dutun de dèr endrez, linies vida e coordinament a l'atività culturèla de la Provinzia. Na encèria ütola donca a dut l setor de la cultura e no demò a chel resservà a la popolaziòn de mendranza. "Poder aer tel Forum, che pearà via coi lurieres chest uton, na persona desche Fabio Chiocchetti - à dit l'assessor provinzièl Franco Panizza - podarà esser de gran ütöl tant per portèr te chest nef ofize de lurier la ousc de la mendranzes che per lurèr fora projec che sie coordiné e luré fora col consens maor che l'é meso."

Te la scontrèda de en mercol passà l'é stat rejonà ence de n intervent da man de la Conferenza tel setor de la comunicazion e del digitèl de la televizion. Chesta revoluzion tecnologica darà l met a la mendranzes de aer n canal entriech a la leta e donca sarà cruzie de chest organism meter a jir n grop de lurier che se dae jù per tor te man chesta ocajion emportanta per valorisèr l lengaz e per se fèr cognoscer miec ence da la jent che stès fora dai raions de mendranza. L grop de lurier sarà cernù fora dò aer sentù e tout sù la indicaziòn che vegn dai Istitut culturèl e da la aministraziòn di comuns de mendranza. TML, Tele Minoranze Linguistiche, l'é l'inom che la televizion TCA de Trent à volù ge dèr a chest nef canal. Co la fin del meis de otober TML se l podarà veder te duta la Provinzia de Trent e te l'80% del teritorie regionèl. Per

ades se trata de na ocajion, de na cèsa da empienir con contegnui e programes. Meter jù n projet organich che posse dèr maor visibilità a la mendranzes no sarà sori e ge volarà troèr na vida per smaorèr l numer e la ores de trasmiscions. Endèna de segur restarà e jirà inant i programes jà envié via desche Ercaboan, l tg cimbro e chel mochen e per diesc setemènes na trasmiscion sperimentèla che met dant informaziòn da Fascia Gherdena e Badia.

Ma l'argument che più à soscedà discuscion l'é stat chel di doi desseignes de lege porté dant da PD e PDL passé te la Pruma Comiscion. La Conferenza se à troà a una e se à dit de contra a doi desseignes de lege che volessa mudèr la lege su la mendranzes aproèda del 2008. L'iter é ja inant e la discuscion te Consei provinzièl é metuda en calandèr per de otober. N document de la Conferenza domanarà al PD, partit de maoranza, de fèr n vèrech endò e de lascèr jir dò brea jù sia proponeta che volessa ge tor al garant la competenzes de defensor zivich. Per no ruèr a l'ejam del legislatif i doi desseignes de lege cognessa esser touc deretorn da PD e PDL. Chest l'é chel che à domanà la Conferenza de la Mendranzes dant de averjer n desch de lurier e confront co la forza politiches che vel mudèr na lege che amò speta de esser metuda en doura te sie contegnù a n an e mez da sia aproazion. (sp)



Fabio Chiocchetti é stat nominà raprezentant de la mendranzes tel Forum trentin per la cultura.